

# Fundaziun pbd regiun Plaun

La pbd en la regiun Plaun sa reorganisescha

■ **La pbd vul concentrar sia forzas e fitgar pe pli bain era da la vart dretga dal Rain. A Domat è vegnida fundada la partida regiunala pbd Imboden/Plaun. Resalvas hai dà da vart da las vischnancas Trin e Flem ch'eran da l'avis che la fundaziun schabegia memia baud.** A la radunanza constitutiva ha pudì *Retus Buchli*, il president da la partida cirquitala Trin, solidar ina quantidad considerabla da commembers a Domat en la sala polivalenta Tircal. El ha motivà la proposta da la suprastanza da la partida cirquitala d'unir la partida cirquitala existenta Trin ed ils commembers da la pbd en il circul Razén – il qual na posseda nagina structura da partida cirquitala. Entant che la pbd dal circul Trin stat sin fundament stabil ed aveva ed ha enconuschentamain duas persunalitads ord chassa Schlumpf en il cussegl federal era la pbd en il circul Razén ch'è dominà da la pcd represchentà uffizialmain mo a Padnuz.

## Resalvas causa Trin-Flem

Tar la decisiun per l'aboliziun da la partida cirquitala Trin hai dà in zic sorprendentamain ina cuntravusch: L'anteriura deputada al cussegl grond *Anita Christoffel*, Trin, ha declarà ch'ella veglia cun sia posiziun render attent che la fundaziun capitia memia baud. Sco ch'ella ha ditg

nun haja la populaziun da Flem e Trin anc decis sch'ella na veglia tuttina betg – era per motivs linguistics – midar tar la regiun Surselva. Cun la refurma territoriala saja vegnida stgaffida la regiun Plaun/Imboden, ussa veglia la pbd profitar da la schanza e vivifitgar la regiun novstgaffida cun vita da partida politica, èsi vegnì punctuà. Silsuenter è vegnida prendida unanimamain la decisiun da fundar la regiun Imboden/Plaun.

## President regional deriva da Domat

Sco president da la suprastanza da la partida regiunala è vegnì elegì unanimamain e cun acclamaziun *Georg Ragaz*. Quai vala era per ils ulteriurs commembers da la suprastanza *Armin Panzer* da Trin, deputà *Felix Koch* e *Beatrice Meier*, omadus da Tumein, e *Retus Buchli*, *Roland Schmid* e *Christoph Widmer-Schlumpf*, tuts da Favugn. Il president da la pbd chantunala *Jon Domenic Parolini* ha gratulà a la pbd Imboden/Plaun per sia fundaziun e giavischà ad ella bler success era da la vart dretga dal Rain dominada tradiziunal- ed actualmain da la pcd. Sut il tractandum varia han ils prechents gist era decis la parola per la votaziun davart l'iniziativa da proporz: Igl è resultà, sco ch'era la partida-mamma propona, in na unanim.

Georg Ragaz è vischin da Tumein, cre-

schì si a Domat – en la Plarenga, nua che ses bab ha manà divers onns il bain puril da la Ems Chemie. La scola primara e secundara ha frequentà Ragaz a Domat, ha absolvi a l'Universitad da Turitg in studi da scienza da manaschi ed è stà alur activ sco manader da project en Svizra ed a l'ester. Ch'el sa legria suenter passa 25 onns da turnar cun in agen biro da cussegliaziun per interpresas e manaschis a Domat. Da las finamiras a temp mesaun da Ragaz fa part era da fundar in bel di a Domat ina partida locala da la pbd.

## Partidas cirquitalas vegnan abolidas

Ensemen cun la furmaziun da la regiun Imboden s'han restructuradas era las partidas politicas. Sco ils circuls perdan era las partidas cirquitalas la muntada politica e vegnan integradas en la partida regiunala. Mo dacurt èn vegnidas abolidas las partidas cirquitalas da la pld dals circuls Razén e Trin. Presidiada dal deputà *Martin Wieland*, Tumein, s'ha furmada la partida regiunala «pld Plaun/Imboden». Las partidas cirquitalas da la pcd collavuran il pli ditg gia en ils dus circuls dal district Plaun/Imboden – dentant da la vart sanestra dal Rain en il circul Trin, dominà da la pbd e pld, cun success modest. Da preschent porta la partida anc adina il num «partida districtuala Imboden». *Claudio Willi/fa*